

四庫全書

集部

欽定四庫全書

鐔津集卷二十

宋 釋契嵩 撰

古律詩共六十首

三高僧詩

并叙

唐僧皎然靈徹道標以道稱於吳越故諺美之曰
雪之畫能清秀越之澈如冰雪杭之標摩雲霄吾
聞風而慕其人因諺所謂遂為詩三章以廣其意
也

雪之畫能清秀

畫公文章清復秀天與其能不可闕僧攻文付自古有
出拔須尊畫為首造化雖移神不遷畫公作詩心亦然
上跨騷雅下沈宋俊思縱橫道自全禪伯修文修或揮字豈
徒爾誘引人心通佛理搢紳先生魯公輩早躡清游慕
方外斯人已歿斯言在護法當應垂萬代

越之澈如冰雪

澈公之清如冰雪高僧筆墨與人別三十能詩名已出

名在詩流心在律不殊惠遠殊惠休皎然未合誰與傳
白雲蕭散何悠悠忽入關中訪包李孤清難立衆所沮
到底無移中輩語木秀於林風必摧澈公懷德成禍胎
古人已往不復歎為爾為詩遺後來

杭之標摩雲霄

標師之高摩雲霄在德豈在於沈寥一庵嶺底寄幽獨
抗迹蕭然不入俗有時虛陟層崖眺不聞其語聞清嘯
當時陸羽事幽討曾入青雲預聞道取雨救旱驅神龍

此與人間事豈同冥機感異心之苗此公所以稱道標

送章表民秘書

一日夫子來山陞來言去別將何之清塵舊尉亦皆至

時周感
之同來

鮮車輕珮光陸離入門顧我顏色好林下把袂

相追隨笑傲恣肆意氣豪舉首不覺白日歌拂榻乃留
富宇宿紙衾蒲席誠可嗤不計豐約但適美唯唯無語
相拒違是時春和二月半永夜耿耿輕寒微高談交發
雅興合如瓶注泉爭淋漓湏臾促席命言志直吐胃臆

撫淳詞人心不同有如面平生各自有所為表民卒然
趨席端曰吾有志人不知末俗淺近烏足語含哺未吐
長嗟咨少從先生學經典不探枝葉窮根基帝王之道
斷可識殷盤周誥無復疑古今事業貴適用文意述作
須有規宣類童稚空琢刻畫餅不能療朝饑十五孜孜
事文字磨礱筆硯精神罷長篇大軸浩無數慷慨但欲
扶政治前年補吏來浙右局務冗俗不可窺傾懷欲效
王霸略騏驎捕鼠非宜宜錢唐大府多達官品秩相較

我最卑孟軻獨負浩然氣誰能斂袂長低眉丈夫所重
以道進青雲萬里須自馳咄嗟顧我胡為者甘以門廕
為身資遂為謝病遠引去遽與簪組相差池膠西董生
苟可慕下帷克苦窮書詩閒居落莫多感激所感時政
生瑕疵賤臣抱節自效作書萬字投丹墀天闕深岩
在西北引領一望雲霓德音畢竟不下報漫陳肝膽
空涕洟嗟嗟吾生時命謬不過當時甘佚遺龍蛇之蟄
尺蠖屈萬物不時須自怡我家田園在南國亦有溪山

名武夷泉甘壤黑堪稼穡歸與老農事鋤基余與感之
聞此語精神飛動驚支頤深謀遠慮不可測滄溟無底
天無涯閭闔門前無限客摩肩踏足爭前詞暖衣飽食
恣氣艷幾輩卓犖能如斯請君更前與君語何必輕沮
煩孜孜嘉穀冬收穫朝發衆物榮茂有疾遲不聞伊尹
五千湯堯舜之道方得施賢傑輕身重天下豈使汲汲
營其私況當夷狄侮中國蹂踐二鄙翻地皮將軍誅討
苦未尅百萬師老勞旌旗凶年樂歲復間作風雨霜雪

猶不時天子勤政不暇食亦待才能相補裨廟堂之上
有君子聰明豈肯饒臯夔執秉公道尊大匠裁度杞梓
寧參差愛君為人性疎達不以其教交相訾臨風明月
千里別祝詞豈憚傾肝脾俗人好毀寡樂善嘉名清節
慎莫虧朝廷若問平津策賢良第一非君誰

古意
五首

風吹一點雲散漫為春雨洒余松栢林青葱枝可取持
此歲寒操手中空楚楚幽谷無人來日暮意誰與

二

君莫笑支許寂寞非愚懵君莫輕嵇阮山林有清興人
生徒百歲樂少憂還剩萬事漫短長無如使道勝爾非
傲世士高蹈釣名稱但謝區中緣甘心棲石磴澄空白
日飛世事終無應不如省爾誠自言還自贈

三

雲中見雙鳥高飛揭日月毛羽賁文章翱翔異鷹鵠脩
然邈千里竟不顧林樾春風漫飄颻勁翮更超忽陌上

遊俠子窺爾徒倉卒雖有金彈丸睥睨不敢發因知奇
異資自保長超越回視黃雀羣胡為戀塵埽

四

堪笑浮雲高凌虛翳日星

凌虛或作扶搖

寧作蘭蕙幽草中自

芳馨自足乃天分未需爾虛靈掩翳之所惡胡為久亭
亭古來曠達士浪跡多晦暝山林惜長往藏用亦藏形
愚谷不可及宵然還自寧嗟余亦羨此岑寂養頽齡

五

窮品偶真叟授我一卷書深林值幽人遺我斧與鋤斧
鋤亦奚為教養材與疏荒穢必須剪使之藹自如授書
欲胡為教爾心與軀學必先正己自治乃及餘此意有
嘉訓佩之未始除如何悠悠人自謬欲是渠相習成薄
俗尠德懷遽篠吾裁此俚語憑君為傳諸

游龍山訪道士李仙師

日出野曠明肅然訪道生杳渺湖外去散誕雲邊行秋
高天宇淨脫葉飛縱橫乘風度林嶺轉覺衣屨輕時聞

縹緲間微颺傳鶴聲知與仙家近逸思冷然清湏臾轉
幽谷紫府芝田平仙童走腳報松子來門迎接袂語且
笑所歡非俗情丹臉人未老道貌天已成開筵羅玉粒
盤餐饅紫英綢繆似交舊洒落懷抱傾薄暮忍云去徘徊倚山楹欲有重尋約還憂變高名

感遇九首

海水晦夜清秋色涵蓬壺有叟雙龍公鐵網羅珊瑚風
雲浩容與悵悵恨何所圖欲問天上人可換明月無

仙人白玉京去去何縹緲瓊樓十二層玲瓏汎雲表銀
湟月為波萬頃即池沼秋來宮殿光逗落人間曉空際
時澄明烟霞眇青鳥可見不可到所思空杳杳

悠哉揚執戟識遠才絕竒初提草玄筆頗為人所嗤卓
卓孔孟道謝爾平嶮巖玉鑑含幽光千載方歲蕤寄語
曠懷士未達休嗟咨心期道自貴俗態勢馬隨青山保
長往白日貞可窺高標謝松栢孤芳操弗移

天威不到處干戈動邊鄙將軍奮威猛英雄勢隨起紛

欽定四庫全書

錦津集
卷二十

七

紛出榆關蕭蕭秋色裏白馬冒黃雲清霜厲嚴旨少壯
羽林兒務能莫多喜好武匪君心用兵不得已寄言飛
將軍妙略應無比志在報君恩豈為黃金死丈夫身許
國慷慨當如此寧教太史書輕笑魯連子

蒼茫天地間流光一何遽曾聞太古人未見曦輪駐才
沈崦嵫雲還上浮桑樹山色愁裡暝天形夢中曙安知
穆天子龍馬神為御萬里速乘風又向瑤臺去超遙侶
神仙此理當何故不向堯年長永使人間住

冠蓋何處客凌雲意氣驕旦旦趨雙闕衝衝過渭橋金
珂雲外響畫燭月中燒縹緲行天路升騰在玉霄如何
區宇內頃與人間遙長拂羅裳去明光殿下朝一俯復
一仰榮多憂亦饒白髮領遙長朱顏鏡裏凋豈知松檜
下幽人長寂寥萬事淡無慮恣卧時長謠浩蕩天地間
孰問羲黃堯臨風一清嘯胡為王子喬

空虛澄遠煙霽色含秋景思君每盤桓駐目千峰頂

駐目

或作
獨往
明月初團圓可照美人影美人來不來雲霞渺林

欽定四庫全書

錦津集
卷二十

八

嶺

林栢地之靈草莽亦同茂願得區域中人心復純素蒼
梧會稽陰罔復有陵墓六合無知音青山有歸路人生
惜朱顏賢照長相顧昨夜露華臺誰不怨秋暮

悠然嚴子陵遠大寥廓器故人貴為君白駒要不至耽
閑戀淥潭高超弄芳餌青山汎白雲萬古寄高意倏霸
不知道初亦嫌傲志何事卑王侯其心越天地因悲婁
護輩胡為附權勢流游絳灌間折節踰蹊例皇皇古皇

道勞生自拘繫不如歸去來乘風拂長袂

懷越中兼示山陰諸明士

厭見人境喧清游憶靈越東南千萬山浮青滿寥沆從
來鑑中景形勝人間絕月湛換鵝溪雲起藏書穴客子
若飄蓬遽與故人別尺素未及通芳草已云歇所悲行
路難俯仰損名節鳴鴈欲東飛寄語謝明月

早秋吟

山家昨夜房櫳冷梧桐一葉飄金井長天如水淨藏雲

明月含暉變秋景桂枝花折風飄飄誰在高樓吹玉簫
人間不見槎升漢天上將看鵲作橋年少征人在何處
白露霑衣未歸去海畔今無漂母家江南誰與王孫遇
徘徊月下空長吟吾徒自古難知音欲上高臺問明月
明月何不照人心

羣賢宿山賦得暮雲崑下宿

微風靜林杪紅日下崑阿明月出已滿白雲歸未多高
應伴猿鶴深不暗松蘿若弗為霖去其如旱歲何

浙江晚望

暮色看無際，秋空水混天。
片帆飛鳥外，新月落潮邊。
隔越山形小，吞吳地勢偏。
幾人來往老，早晚渡頭船。

題徑山寺

翠拔羣山外，連天勢未休。
雲迷飛鳥道，雨出古龍湫。
僧在深雲定，香和杳靄浮。
人間游不到，臺殿自清秋。

郎侍郎致仕

平時獨高謝，道勝欲韜光。
白髮辭明主，青山戀故鄉。
藥

畦容鶴到吟徑恐雲藏更愛禪林卧時來拂石牀

山中早梅

亭亭映晚景皎皎出林端小圃連雲淡孤芳冒雪寒人
間殊未見物外最先看但欲方瓊玉寧將勝牡丹

汎若耶溪

越水乘春泛船窓掩又開好山沿岸去驟雨落花來岸
影樵人渡歌聲浣女回滄浪無限意日暮更悠哉

書毛有章園亭

愛此園林好重來花木滋游
人醉不去幽鳥語無時烟
郭連芳草春湖泛淥池松篁
非俗韻游子漫相期

山亭晚春

山庭晚來靜林石自巉岬犬
去吠人語花飛恣鳥銜晴
烟熏茂草煦日藹高杉更喜
團圓月清光下碧巖

自贈

靜坐還看竹閒行亦合樵道
心應有在生事合無憀客
去清談少年來白髮饒漫將
支遁筆閒且賦逍遙

夏日無雨

山中苦無雨，日日望雲霓。
小暑復大暑，深溪成淺溪。
泉枯連井底，地熱亢蔬畦。
無以問天意，空思水鳥啼。

俗謂水鳥

啼則天
下雨焉

歲暮書懷

朔風適變寒，曉日將含煦。
南國殊未還，東山歲云暮。
浮生奄忽往，芳顏安得駐。
寄謝人世間，紛華尤可悟。

山中早行

前山經夜雨獨往步春泥
天岸日將出田家雞更啼
孤烟行處起曠野望中低
猶喜逢樵客相將過數溪

湖上晚歸

人間薄游罷歸興尋舊隱
春岸行未窮夕陽看欲盡
嵐光山際淡天影水邊近
自憐幽趣真清吟更長引

季春寄友生

湖上無烟畫人間寒食時
陰晴春易變花月候難齊
未畏青蛙亂先愁紫蕨衰
雲山向漸熱相訪勿應遲

寄懷泐潭山月禪師

聞道安禪處深蘿杳隔溪清猿定中發幽鳥坐邊栖雲
影朝脯別山峯遠近齊不知誰問法雪夜立江西

送客還北闕道中作

北郭送陽子日斜歸舊居路泥侵曉潤晦月逼春餘桑
柘雨中綠人烟闕外疎依然見風俗歸興混樵漁

次韻無訾赴承天再命

載命還高讓知君所趣深青山當隱處白髮欲栖心更

俟逢梅雨何妨過虎林潺湲合澗水六月足清音

山舍晚歸

薄暮還精廬徐行無所並日入月還清山空水更靜彷彿聞疎鐘翛然在西嶺寄語高世流來茲謝塵境

讀書

讀書老何為更讀聊遮眼此意雖等閒高情寄無限錯磨千古心翻覆幾忘飯不知白雲去春靜山中晚

送盧隱士歸廬山

世事如循環是非終莫盡羨爾歸深山任他譏小隱黃
鵠舉已高白雲去非近天籟歸寂寞何峰弄清軫

還南屏山即事

歲晚歸來石室寒松蘿岑寂自盤桓但知林下一年過
不見人間萬事難招隱有詩題石記解嘲無說與時看
此心已共空生合身似浮雲不必觀

入石壁山

身似浮雲年似流人間擾攘只宜休老來已習青蘿子

隱去應追白道猷直入亂山寧計路定看落葉始知秋
他時谷口人相遇莫問裁詩謝五侯

山中自怡謝所知

萬事隨宜勿強攀暫過朝市即歸山勞生未必浮名好
稱性應須到處閒都似夢中休問影只堪吟裏更怡顏
襄陽道者寧知爾猿鶴蕭然石室間

寄承天元老

清散年來事益閒不論林下與人間禪心至了非喧靜

默客何妨更往還
竒石清軒增勝趣
流泉碧座照衰顏
支形脫略時機甚
應笑歸來別買山

誠題
因事

高吟遠矚倚雲梯
往事經心盡可題
道德二篇徒自辯
是非一馬豈能齊
暉山真玉傷驚火
失水靈蛇畏在泥
寄語冥鴻上天去
凌雲羽翼莫思低

元日

暗裏春催曙色明
百雞迎曉報新聲
宿寒尚在龍蛇蟄

歲歷初傳日月迎，
莫葉四時今始發。
梅花一旦占先榮，
山家也祝堯天壽。
漫學牛山報太平。

著書罷思南還復會客自番禺來因賦此詩

平昔著書今粗畢，
南還終欲隱羅浮。
初春况遇故鄉子，
終夜更誇滄海遊。
但貴羊城風物好，
豈辭梅嶺路岐脩。
應須相與葛洪輩，
抗迹山林送白頭。

冷泉獨賞寄冲晦上人

南風掠波溪水滿，
山中幽人來洗浣。
獨立溪傍清興歎，

更愛泉流芳草短平生幽討貴蕭散世道紛紜何足算
人間五月夏雲煩相約歸來君莫緩

遣興三絕

逸興應須傲皎然此生瀟灑老詩禪何妨剩得驚人句
詠徧江山一萬篇

吾道陵遲事事訛而今無計遏頽波徇人玩法成流俗
但泣金書柰爾何

去年聊駐江頭寺今寄林僧岳下扃莫謂此身無定迹

人生都類一浮萍

書南山六和寺

青蔥玉樹接溪岑
臺閣凌虛地布金
行到白雲重疊處
水聲松韻淡人心

寒食日雨中

漠漠行雲晴復陰
野花垂濕晚沉沉
游人莫怨天多雨
況在東臯春已深

早起

天窓月過星踈渺
檐際冥分雲窈窕
山家深處勿難啼
時有寒鷄來報曉

對喜鵲

靜卧時驚鵲喜多
須臾果有故人過
山中明度還無事
問爾綿蠻更語麼

寄晤冲晦

年老相看眼倍青
念君詩思苦勞形
人間更有無窮感
好把禪關護性靈

洗筆


古人信文字字字從此出天下心不欺爾亦有陰隲濯
之遺孺子念茲未應失

遊大慈山書畫上人壁

谷裏侵雲寺尋幽到深處春過寒花開人來啼鳥去豈
期草庵客日暮此相遇

清溪

勿謂清溪清長如鏡初洗湏防苟容物汙爾清到底



潭津集卷二十

欽定四庫全書

集部

鐔津集卷二十一

詳校官庶吉士臣朱理

檢討臣何思鈞覆勘

總校官進士臣繆琪

校對官監丞臣張曾炳

謄錄監生臣陳燦

欽定四庫全書

。鐔津集卷二十一

宋 釋契嵩 撰

此與楊公濟晤冲晦山游唱和詩

自有序見前序錄中

今總

編于此貴後賢披覽以見一時文會之清勝焉

歲暮值雪山齋焚香獨坐命童取雪烹茗因思柳絮隨風起之句遂取謝道蘊傳讀之見其神情散朗故有林下風氣益發幽興乃為詩兼簡居士公濟彼上人冲晦

東山沙門契嵩上

簷外驚風幽鳥歸窓間獨坐事還稀初看歷日新年近
喜見山林驟雪飛但憶故人能有詠寧懷久客此無衣
鮑昭湯老能乘興城郭何如在翠微

章安楊蟠次韻

零落東山老佛師古來獨往似君稀雪邊氣候春將破
林下神情句欲飛後日當尋慧遠社何人更贈大顛衣
一篇感發渾閒事湏脫青衫動少微

錢湖艸堂沙門惟晤次韻上

雪滿西山春未歸
泉聲凍咽鳥聲稀
靜觀眼境人間渺
驅逐詩魔天外飛
一飽每將松作飯
大寒重換紙為衣
我憐詩是君家事
更約論心極細微

約冲晦宿東山禪寺精舍先寄 蟠

上人合動林間興
吾恨衰遲學謝安
納屐操筇那有限
吹雲落雨漫無端
先憑報信春枝破
預想分題雪屋寒
林下不諳人世苦
笑將雙鬢與君看

次韻和訓 契嵩

襄陽習子不貪官欲友幽人擬道安
冒雪履霜臨歲杪攀蘿挽翠到雲端
初論浮世慚年老久對清規苦夜寒
空感知音何以報但誇山水富君看

將訪永安東山禪師先寄 惟晤

庵在千株松桂下更無塵事到夫君
高蹤罕過呼猿澗靜思唯看抱石雲
日暮坐間禽影集雪晴岸畔路形分
揚雄約我須投宿月裏禪餘怯論文

次韻和訓 契嵩

歲晚陰沈天宇昏，宗雷訪我更攜君。
相期石屋宜投宿，獨憩山茨學卧雲。
雪映窓櫺人已靜，風吟燈影夜初分。
自憐惠永多閒散，強接清言媿不文。

宿永安方丈書呈東山禪師 蟠

千年道在高僧傳，未論詩人更有評。
曾著文章原大道，獨推性命濟羣生。
白雲已鎖山間寺，流水空傳世上名。
林遠不聞鐘磬作，五更幽鳥轉春聲。

次韻和訓 契嵩

詩豪何遜宿崑局品格高卑徹曉評未省窓前無月到
唯驚席上有風生却超年少偏高隱莊子才雄不近名
明日君歸草堂去莫將平叔擬虛聲

次韻奉和 惟晤

道安獨繼襄陽踵詩好慵窺雪畫評竹屋數間經幾載
草衣三事傲平生縱陪林下收孤迹難學人間走大名
燈火已殘談未倦曉風斜雨打牕聲

嘉公濟冲晦見訪 契嵩

數曲青溪山數重山深日暮已鳴鐘
忽聞行客門前語
來覓幽人林下蹤
初接風流殊歷落
更張燈火倍迎逢
不須便去疑無待
已有黃糧在宿舂

次韻和訓 蟠

數百招提隱亂峰
蒼茫豈復辨君鐘
春含未得黃鸝報
路轉唯尋白鹿蹤
庵在月邊長不鎖
興來天外忽相逢
山人莫笑衣冠客
亦有鴻來待賃舂

次韻和訓 惟晤

白雲蒼海一重重，傍舍遙聞隔塢鐘。
月上更無人語鬧，雪深空認虎行踪。
詩書共喜燈前論，茗果翻疑夢裡逢。
脫塵高談無限樂，煨爐寒擁日高春。

遊靈隱遇雨呈普慈及二詩翁 蟠

山老未容山客去，故將雲陣鎖山門。
雨催晚色凝諸嶺，雷送春聲落後村。
今夜青林妨月上，故人白首把詩論。
來朝山水終瀰汎，策杖相隨討澗源。

次韻和訓 契嵩

暮雲將雨苦紛紛
看雨攜君倚寺門
飛鳥驚雷歸後塢
落梅流水出前村
名山當爾何須去
勝事而今更好論
況有禪翁通妙理
徘徊重款扣真源

次韻和訓 惟晤

雨洗羣山秀色分
一筇雙屐到松門
天邊雲散爭歸洞
島外樵還各占村
久著青袍心已厭
相看白首事休論
請君細問黃梅老
當信禪河別有源

同公濟冲晦宿靈隱夜晴 契嵩

不睡還烹北苑茶
寒風落盡適來花
夜深雨過山形出
天靜雲空月色佳
且喜僧窓晴似晝
莫論人世事如麻
况陪支許皆能賦
豈厭留詩在碧紗

次韻和詠 蟠

山風亦會山人意
卷盡天紛掃雪花
明月當樓情已興
碧雲落紙句還佳
霜威忽霽應通物
仙侶相便合姓麻
羣動已消林木響
卧看星斗隔窓紗

次韻和訓 惟晤

戰退睡魔重酌茗再披文卷眩生花喜逢長夜身雖健
勉和新詩興未佳風細猿聲清似梵月明杉影密如麻
臘寒燈炷飛蛾滅何必殷勤護薄紗

早過天竺呈明智及同遊二老 蟠

雨夜靈峰卧竹床平明屐齒到雲堂門前雨過新溪滿
石上風回舊草香山抱鐘聲圓不散雪鋪瓦面冷無光
理公莫恠詩相惱今日偕行總姓湯

次韻和訓 契嵩

澗北夜依禪舍宿峰南今訪講師堂
初行松路愛清曉及過石橋聞異香
日色煖烘諸壑淨晴嵐翠潑幾峰光
道標尚客何高趣更飲吾曹栢葉湯

次韻和訓 惟晤

曉過翻經臺下寺與君同謁祖師堂
庭前紫桂葉頻脫石上紅梅花正香
出洞陰雲分遠影挂松寒日漏清光
謝公勸飯須無讓不許非時薦茗湯

南澗傍遊戲呈公濟冲晦

契嵩

相引朝來碧澗傍
山林雪盡水流長
未應驚鳥下苔岸
先共觀魚跨石梁
日淡沙寒鷗自聚
歲闌春入草含芳
鮑昭湯老湏同詠
何必人間萬事忙

次韻和訓蟠

澗南一嘯清風發
林下重來白日長
雲遠石深連鷺嶺
水寒沙淺似魚梁
漫因野老詢前事
閒伴幽人擷衆芳
更欲窮源情未已
知君嗔我索歸忙

次韻和訓 惟晤

撥雲過得南隴去流水激澌一澗長磐石誰堆補缺岸
老松自倒成危梁沙禽呼雌頻叫噪山藥吐色常芬芳
臘去春歸山愈好喜君共無塵事忙

遊天竺上寺呈東山仲靈冲晦 蟠

入林已忻猿鳥樂共傲浮生勝大還身外是非雲不繫
社中留戀雨相關藍輿寂寞媿彭澤拄杖風流肖德山
寄語葛洪畧下水莫流清夢落人間

次韻和訓

契嵩

其訪迢迢深塢寺仍隨野老賣樵還鳥栖已定人方到
暮色雖濃門未關今宿岳房休問法來朝臘屐重登山
平生勝友殊難會莫厭相攜寂寞間

次韻和訓

惟晤

天寒雨細日將暮泥滑誰禁策馬還砂穴吐泉鳴泱泱
竹叢歸鳥語闐闐聊晞謝客須穿屐莫羨支公獨買山
方外論交情未淺願陪投老白雲間

同公濟冲晦遊天竺兼簡呈

伯周禪老 契嵩

愛此蕭然松塢深詩流邀我此相尋
蒼茫寒日纔開霧靄鬱濃雲又結陰
安石放懷還劇賞皎然乘興合清吟
主人勤駐禪扉宿况值梅香正滿林

次韻和訓 蟠

不問猿崖鳥道深攜筇著屐伴君尋
山中桂子驚寒夜雪後梅花逼歲陰
欲住更逢青眼顧相看須盡白頭吟

他年若讀高僧傳未放湯休與道林

次韻和訓 惟晤

平昔詩禪友契深更來人外事幽尋雨餘澗壑流寒響
歲晏檉杉老翠陰袒跣不妨陶令醉風流多傲洛生吟
山翁解榻延清賞未放前賢勝竹林

宿天竺再贈東山禪師與冲晦 蟠

仲靈述作慙知己冲晦篇章竊賞音勝侶俱恬山水樂
神交已過雪霜深燈前自笑平生事雨後重論一夜心

相檢莫教詩間斷更闌同聽夜猿吟

次韻奉和 契嵩

沈侯才雋冠儒林詩語驚人金玉音學海平生慙我淺
詞源今日羨君深強睎老格須張膽喜聽清言更洗心
賡唱苟能容累句漫陪梁甫續高吟

次韻奉和 惟晤

燈火青熒雲塢寺清猿叫斷有餘音檻梅雪白春風近
山雨盆傾澗水深背世迹憐高鳥迹結交心契老松心

訓君秀句無新語徒攪詩腸徹曙吟

宿天竺寺賦聞泉呈二老 蟠

我有泉中興平生愛水經山空時泱泱夜靜轉泠泠暗
脉來湍急清聲出混冥月寒風不響高枕與君聽

同賦聞泉 契嵩

歲晏林間宿初聞況夜晴漱寒醒客夢飛響應山鳴深
澗松風靜幽人石室清誰人能為我寫此入琴聲

同賦聞泉 惟晤

澗泉吾所好山舍寂無喧
春脉生雲底夜聲來枕前
風休不動竹月上未啼猿
石上鳴逾急冷然清夢魂

送公濟冲晦出山兼簡駐泊所諸公索和奉寄

李思文 契嵩

幾日山遊霰雪稀相隨野老亦忘機
始憐洞裏雲堪臥又憶人間歲杪歸
夜落梅花應滿路風含春色自吹衣
憑君為語王孫道音信終須寄鳥飛

次韻奉酬 蟠

臘後東風掃翠微同看芳柳破鋒機
三宵聽水都無夢
四日登山未肯歸
野老且憑雲送客
家人應笑雨霑衣
君詩兼簡佳公子
只恐囊傾一夜飛

次韻奉和 惟晤

招攜綠野村邊去
累日青山曠世機
惜向永安蘭若別
還經靈隱渡頭歸
雲峰積雪迷樵徑
石罅新泉濺客衣
詩會末由陪帝戚
心隨雲鳥入城飛

遊山歸遇雨呈仲靈冲晦 蟠

九里松門雪過時
籃輿裊裊礙松枝
雨留宿客還斜落
風送行人亦倒吹
華表忽驚黃鶴反
耳中猶帶白猿悲
來朝弗著登山屐
可避君呼謝客兒

次韻和訓 契嵩

巖維靈澈出山時
避雨曾聞礙木枝
歲杪霜寒何足畏
管中春色已堪吹
風含鐘韻凝還散
水結溪聲咽又悲
閬草野遊君莫笑
初平元是牧羊兒

次韻奉和訓 惟晤

興高未肯輟清詩
捨轎重扶櫛栗枝
松栢青肥春雨洗
烟雲輕健澗風吹
樵歸後塢連聲唱
鹿過前溪失隊悲
莫道還家甘寂默
陶潛自有五男兒

山中回憶東山老 蟠

山游興發特尋君
屐齒筇枝繞四鄰
峰北看雲忘世務
澗南聽水得天真
名高寂寞存僧史
林下風流似晉人
何日枇杷苦笋熟
却遊未減去年春

君去年有苦笋
上枇杷熟之句

次韻奉酬 契嵩

君事逍遙入亂雲與君躡屐遍溪鄰林間聽鳥聞偏好
烟際觀山見匪真澗水只能忙送客岩花不解久留人
樂天更有龍門約勝會應須趁早春

連得公濟出山道中見示二篇鄙思枯涸奉和
不暇且乞罷唱 契嵩

詩篇留落野人窓又得虞卿璧一雙恠似蛟龍出古水
清如日月浸秋江賡吟何止夸山澤變雅終須繫國邦
為報詩家驍將道雪關休唱已心降

次韻奉酬 蟠

幾夕論詩坐石牕
憐君百首妙無雙
勾牽野興侵孤月
惱亂詞源湧大江
數紙忽然來竺嶺
千年猶可照吳邦
相思未免還相挑
莫豎旗旛却詐降

出山至中途寄永安禪師 惟晤

松行未盡却回頭
寒雨霏霏已漸收
望海閣邊雲繚繞
行春橋下水奔流
山庵驟別高談遠
城寺將歸滿面羞
須倣著書同說法
悠悠人事漫拘囚

次韻和訓 契嵩

忽憶山中人白頭歲闌喜看雪初收詩篇見賞皆高興
謝客相隨非俗流却有崑雲供夜卧況無土食備晨羞
愛君吟詠殊堪聽金玉聲音勝楚囚

公濟冲晦出山次日奉寄 契嵩

孫綽曾陪支遁遊千年人謂兩風流羨君慕此乘雙屐
結侶還來共一丘衣冷雪霜猶未去興高雲月肯甘收
耽詩重道皆無比應敵當時萬戶侯

次韻奉酬 蟠

猿聲未落鳥聲愁
筍發花開澗水流
還對春風驚節物
漫思野老傍林丘
古人得道多深隱
賢守知名貴早收
林下頻過君莫恠
自看骨相匪封侯

次韻奉酬 惟晤

今日追懷昨日遊
二君乘興似奔流
遠尋幽壑行拖屐
累到深雲卧枕丘
崖竹蕭疎晴影亂
塢梅零落晚香收
會須重訪藤州老
更約高才沈隱侯

次韻奉和 契嵩

樂天已與廣宣遊更出風塵外俗流酒聖盡能非畢卓

詩仙皆欲接浮丘

聞公濟與冲晦遊斷此輩酒多隨其奉戒

篇章逸處江山

動筆硯閒時雲雨收况有聲名俱籍甚並飛南北動王侯

歲暮還西塢寄公濟無訐 契嵩

乘興溪邊去仍從林下歸梅香帶春信日色煖人衣白髮思還遠清流遇更稀野禽寧會意相顧向柴扉

日色暖人

衣或云日
暮入人衣

次韻奉和 蟠

閒說西庵好藤州恐不歸延年松可食避世草堪衣
山塢雪應壞林端梅亦稀猶憐二禪老佳句及城扉

次韻奉酬 訥元

野步溪流靜源深興未歸晚禽栖雪竹殘霰洒禪衣
放意天涯遠狂吟人落稀詩成寄吾侶清氣動林扉

次韻奉和 惟晤

白髮東山老青林西塢歸聽猿時駐錫厲水自褰衣高
論才難敵孤蹤行亦稀慚君寄樵採佳句出宮扉

寄東山禪師 端

高卧西林月孤閒獨見君杖藜探澗水歌枕看山雲鹿
過何人見猿啼只自聞篇章知幾首寄我莫辭勤

次韻奉酬 契嵩

脩然林下隱吾道異夫君習忍如幽草觀身類片雲人
情無意淖鶴唳有時聞謝客詩懷寄憐君此興勤

蟠雪夜登湧金樓遠望西山憶仲靈洒然有邁
世之風因思山陰王徽之雪夜獨酌四望皎然
徘徊詠左太冲招隱詩忽憶戴逵扁舟乘興余
恨未能遂往聊寄此詩

家占西湖島上雲雪光月色更冰魂興來爛漫投空老
投或作心詩罷蒼茫眼正昏晉國衣冠何處覓梁朝殿閣儼
猶存思君不及山陰夜遙望青松聽雪猿

次韻奉酬 契嵩

瞑色陰森雪和雲故人當此動吟魂
烟凝火冷萬家靜
水色山光竟夜昏興發晉賢前古遠
詩傳蕭寺邇今存
春歸崑壑多芳樹漫欲邀君同聽猿

寄勉冲晦速和拙什 蟠

冲晦僧儒詩者豪尤憐賴汝壯方袍
一千篇興時無敵
三十年功格最高白髮逢春今更勇
清吟徹老莫辭勞
何朝始肯將珠玉却報仙人換木桃

次韻奉酬 惟晤

杜門誰復念吾曹
老畏春寒擁毳袍
懶慢從來徒自笑
唱酬今更怯君高
曾無道譽喧喧播
厭把肝脾苦苦勞
佳句忽來催野句
譬將凡果逼仙桃

新歲連雨不止因寄公濟兼簡維晦禪丈暨賢令強公契嵩

寒郊纔喜歲華新
景物陰陰又一旬
雲帶天低垂壓野
雨藏春晝暗迷人
寧愁燈火妨明月
却嘆詩家惜令辰
陶令而今臥江國
倚樓吟望更誰親

次韻和訓 蟠

林扉厭聽雨聲頻為惜春風只九旬
衰撲山花將放杏
侵尋歲月已過人何時好去遊南澗
每夜空來望北辰
愁坐更無車馬客獨憐詩筆謾相親

竊觀仲靈久雨詩且道余與公濟吟從之意輒
次韻奉和 至

詩興勾牽日日新年光初破雨彌旬
舊遊已得新工部
佳句今逢休上人

仲靈文章大手非特
休比比以詩言耳

雲外馳心闕水

石江邊搔首望星辰泥深未愛尋山屐誰與西庵杖屨
親

重次元韻 至

吟思那知歲月新初鶯啼雨早經旬娟娟野竹通寒水
洗洗江梅冷照人驚嶺並遊勞夢寐虎溪一笑尚參辰
千金褒字形篇尾迹未相同意已親

又次韻奉寄強令 契嵩

冉冉流年年歷新仲春春日未盈旬何為萬里青雲士

來問雙峰白髮人
詩思雅驚含老格
風神清爽惜芳辰
况聞傲令陶元亮
臘屐須來與我親

重次韻奉酬 至

千年支許事如新
欲寄前遊漫歷旬
雨帶黑雲遮俗客
猿呼飛鳥伴幽人
從容劇論知何日
感激佳篇慰此辰
四海聲光非鑿齒
道安名重若為親

鐔津集卷二十一

欽定四庫全書

鐔津集卷二十二

序詩讚題

序

昔賢首菩薩於華嚴會中以偈答文殊大士讚菩薩能
示同世間云雅思淵才文中王歌舞談說衆所欣信乎
文之能顯道濟物也豈獨今之然乎自往古他方佛世
無不然耳始余年少時走四方叢林尋訪師友務道專

學有效古高世僧萬里求師之志於稠人中沈沈自策其氣志若上將軍負所欲建立邦家之意前邁敵國而且戰且行不遑食息也聞所謂東山明教禪師之高文卓行道邁識遠凡獲見其所著文畫莫不錄叙而秘藏之及於錢唐靈隱山得嘉禾陳令舉所撰師之行業記石刻末云師自定祖圖而下謂之治平集又有嘉祐集總六十萬餘言而其甥沙門法澄克奉藏之以信後世繼聞其廣本除已入藏正宗記輔教編外餘皆在姑蘓

吳山諸僧室藏之余固累遣人至彼山諸僧居歷訪之而寂然無知其所在者往往所委不得其人失於護藏而為好事者竊移他所也大觀初余居儀真長蘆之慈杭室於廣衆中得湖南僧景純上人者入予室一日投一大集於席間曰此老高之全集也秘之久矣聞師切慕其遺文願以獻師余獲之且驚且喜念茲或天所相而授我耶若獲至珍重寶自皇極中庸而下總五十餘論及書啓叙記辯述銘贊武林山志與諸雜著等約一

十六萬餘言皆舊所聞名而未及見者雖文理少有差
悞皆比較選練詮次幾始成集庶可觀焉更冀善本較
詳莫由得也後又遇周格非出守虔州回得其非韓文
三十篇三萬餘言又緣兵火失之遂未能就其集近又
得本於語溪東藍彥上人乃與余昔於匡山所得別本
較之文字亦甚踈謬乃以韓文條理而正之然師之著
述不得其傳而散落多矣如天竺慈雲法師行狀曲記
長水暹勤二師碑誌行道舍利述匡山暹道者碑定祖

圖序皆余自獲石刻而模傳之今摠以入藏正宗記定
祖圖與今文集等會計之纔得三十有餘萬其餘則蔑
然無聞矣如令舉所記謂有六十萬餘言者今則失其
半矣吁嗟惜哉今以令舉所撰行業記標之為卷首貴
在見乎師之世系嗣祖出世去留之迹奇節偉行高才
勝德邁世之風焉乃以輔教編上中下為前三卷以師
所著之文志在通會儒釋以誘士夫鏡本識心窮理見
性而寂其妬謗是非之聲也又以真諦無聖論綴于輔

教編內壇經贊後以顯師之志在乎弘贊吾佛大聖人
無上勝妙幽遠淵曠之道不存乎文字語言其所謂教
外別傳之旨殆見乎斯作矣故其贊末云示法非文字
故至人之宗尚乎默傳也又曰聖人如春陶陶而發之
也至人如秋濯濯而成之也此謂終歸乎靜默焉故真
諦無聖論結云凡聖知覺者真諦之影響安心之攀緣
耳然有志於外文字之學者覽此二說豈不少警於中
乎其輔教集舊本以累經鏤板故雖盛傳于世而文義

脫謬約六十有餘處今皆以經書考正使覽者可以古
本參讀之則其踈謬可審矣今自論原而下至于贊辭
約為十二卷次前成一十五卷昔題名嘉祐集者是也
其非韓文昔自分三十章今約為三卷次前成一十八
卷又得古律及山遊倡和詩共一百二十四首分之為
二總成二十卷題曰鐔津文集示不忘其本也然師常
自謂人生世間閒為第一蓋其自得閒中之趣故其所
為之詩雖不甚豐濃華麗而其風調高古雅淡至其寫

志舒懷有邁世凌雲之風亦可想見其人也觀師與月

公晦書自言余志在原教而行在孝論余詳考其書則

功在於原教非韓行在於書僧

即僧也者

孝論德在於志尚

遠公而題其影堂文道在於壇經贊真諦無聖論其文

之高拔勝邁絕出古今則見於武林山志故後叙謂因

風俗山川之勝欲拋擲其思力以收其景趣也乃作武

林山志然求世之知言審音者不亦難其人哉師自攜

書上謁天子卿相而下凡所見則止以正宗記輔教編

而投之至於文忠公則特獻之新撰武林山志焉嗚呼
文忠公謂文章如精金美玉市有定價非人輕可以口
舌輕重之也其重讀徂徠集云待彼謗燄熄放此光芒
懸人生一世中長短無百年無窮在其後萬世在其前
得長多幾何得短未足憐惟彼不可為名聲文行然謔
誣不須辯亦止百年間百年後生者憎愛不相緣公議
然後出自然見姍妍故師之於慶歷間始以文鳴道於
天下然當是時也宗儒束教輩是非之鋒謗罵之焰紛

然而師終以是道發而著之為高文至論乘風而殄之
蔑如也故後世學者有聞其風務其道而矚其文者若
脫冥遊望北辰仰昭回也然茲姑以師之經世文章恢
弘輔贊吾如來至聖之教之道涉人間世而然也若其
自所履蘊操守則瑩然若珠光玉采日精月華而不足
以方其溫潤高潔明淨也故令舉記其行業云師之所
以自得而樂諸已者蓋不與於此中間雖以護法遭難
然其所謂珠光玉采日精月華者世雖見其有烟雲水

火焚溺蔽虧之患而其光采精華固瑩如也故師之自
攜書西上獻之於天子事畢將東歸山林而大覺璉禪
師賦白雲謠以將師之行云白雲人間來不染飛埃色
遙爍太陽輝萬態情何極嗟嗟輕肥子見擬垂天翼圖
南誠有機去當六月息寧知網緼采無心任吾適天宇
一何遼舒卷非留迹然則師之風貌聲容其所以出處
斷可見也矣紹興改元之四年甲寅重陽後一日書于
禦溪東郊草堂之北軒

沙門 懷悟

又序

師自東來始居處無常晚居餘杭之佛日山退老于靈
峯永安精舍然眎其迹雖或出處不定然其所履之道
高妙幽遠而末路學者器近不能曉悟而師終亦不肯
少徂其韻以撫循其機因而嘆曰吾安能圓鑿以就方
柄哉聞聖賢所謂得志則行其道否則行其言而已言
之行猶足為萬世法使天下後世學者識度脩明遠邪
見而游正途則奚必目擊而授之謂從已出耶因却闕

著書以考正其祖宗所以來之迹為十二卷輔教編
三卷又列定祖圖一面書成攜之京師因內翰王公素
獻之於仁宗皇帝又為書以先之上讀其書至臣固為
道不為名為法不為身歎愛久之旌以明教大師之號
賜其書入藏書既送中書時魏國韓公琦覽之以示歐
陽文忠公修公以文章自任以師表天下又以護宗不
喜吾教及見其文乃謂魏公曰不意僧中有此郎也黎
明當一識之師聞因往見之文忠與語終日遂大稱賞

其學贍道明由是師之聲德益振寰宇事竟遂買舟東下終老于山林師雖古今內外之書無所不讀至於所著書乃廣明外教皇極中庸之道安危治亂之略王霸刑名賞罰之權而終導之歸於無為寂默之道當世聞人少見其比肩焉而痛以內教自律其身端以儉素誠德為宿歸之地而慕梁惠約之為人 also 其所蘊至道淵密然以其所學較其所為而未見少差焉所著書觀當世士大夫不顧名實而是已非他也

謂以儒而嫉佛

乃作輔教

編學者亡孝背義循養其所欲也乃作孝論尚綺飾
辭者而不知道本也乃作壇經贊苟合自輕而不自
上以德也乃題遠公影堂文志其所慕以風末世之
華侈也乃作山茨堂序因風俗山川之勝欲拋擲才
力以收其景趣也乃作武林山志其明聖賢出處之
際性命道德之原典雅詳正汪洋浩渺尤為博瞻總
號之為論原其如詩書序贊記傳表啓銘誌題述評
辯是是非非所謂太山之毫芒耳及後終於湖山而

火化不壞者六物天下聞其風莫不東首而長想嗚呼師雲行鳥飛於天地之間視萬乘之尊其勢霄壤之遼也顧王公貴人雲泥之異也一旦以其所為之書獻之天子為之動容天下靡然嚮風而使其乃宗乃祖吾佛無上妙道明白於萬世而卒酬其抱道輔教之志非其自信修誠之效歟後之學者讀其書必有掩卷而三歎者也嗚呼師之道譽聲德既甚超邁故後世學者或當在位道贊人主師表

於天下後世者皆仰而慕之若天雲日星焉故有尋
遺風想遐迹瞻頌稱讚不已有若前所紀淨因大
覺璉禪師將師之白雲謠若江西洪覺範之禮
師之骨塔詩若南海楞伽山端介然吊師之古詩
凡百韻者西蜀住龍舒天柱山靜禪師遙慕師
之道譽聲德而序贊者若靈源惟清禪師之跋
師二手帖而伸贊之者今皆筆之于此或詳或略
以備研覽而發李世佛學者之志操焉其淨因

大覺璉禪師送師之白雲謠者已見前之後序
中此不煩錄矣

今既以陳令舉所著之記為前叙舊得一叙不
書名不知何人所作或云瑩道溫觀其文藻美
麗或近似之他輩不能為也而中間叙其為文之
所以而不及流類不免隨為葺正之仍舊綴于
集末云

禮嵩禪師塔詩

三十一韻

吾道比孔子譬如掌與拳展握故有異要之手則然晚
世苦陵夷講習失淵源君看投迹者紛紛等狂顛韓子
亦儒衣倔強稱時賢憑陵作詬語到死不少悛後世師
韓輩冗長猶可憐趨名不自信泛逐工詞言譁然皇祐
初飛聲開喧闐田衣動成羣怒癭空自懸縮首不暇息
兀坐如蹲猿堂堂東山公才大德亦全齒牙生風雷筆
陣森戈鋌隱然湖海上長庚橫曉天作書肆豪猛揮斥
莫敢前羣兒雖貌敬臆論已不專書成謁天子一日萬

口傳坐令天下士欲見嗟無緣功成還山中笑語答雲
烟我來不及見山水自明鮮入門寂無聲修竹空滿軒
永懷脩然姿骨目聳清堅僮奴豈知此住茲亦彌年指
余以石塔草棘北峯巔再拜不忍去聽此遶澗泉吁嗟
末運中那復斯人焉文章亦細事清苦非所便但愛公
所守遠拍諸祖肩遲遲哦公詩落日滿晴川願持折腳
鐺結茅西澗邊歲時邏松檜來此掃顏磚

石門 惠洪作

吊明教嵩禪師詩凡一百韻

并引

建中靖國改元辛巳冬十一月既望余抱遠公文
集自廬嶽而東圖入木錢唐布流天下乃特詣師
故居永安精舍之後嶺端蒙雪霜排榛莽於所藏
閣維不壞之五相舍利小石塔前恭備香羞茗燭
等作禮以供焉因抽鄙思爲五言古詩凡一百韻
長跪端想誠百其心絜若有對遂作南音稽然以
諷之庶不忘其本而聊爲攀慕悼之之誠也禪師

平日有詩云異鄉風俗客不惡但欲南音來耳邊
余連與藤東西交徼最爲密邇禪師遷寂在於熙
寧五年之夏余纔八歲其實忝師里中之晚生所
作南音不得不爾苟不離正受庶其裁擇焉

覺城否復隍慧日書有食苟無明哲士曷以救顛仄緬
惟東山師降靈自天德申甫寧加諸奮身若匍匐吾法
傾不綱蒼黃莫之測詵詵排佛徒岩岩侍君側適操權
衡者兼領辭翰職率意務品藻庶形在埏埴唐書預之

修韓語例增飾竊自比孔孟拒我過揚墨惜彼迷至言
曾之通皇極廢道專以人訐惡肆其力坑焚必有待伐
削豈容刻愚俗初易欺聖主終難惑當時禪講輩動類
百千億獨誰敢枝梧縮手俟徽纆唯師奮然作感憤形
諸色一言塗腦肝萬卷羅胃臆人爵猶唾遺冥鴻詎籠
得蠢蠢嗟東人遲遲別南國歷楚仍騁吳百城慕知識
義龍雲之天禪虎角而翼誅茆靈峰西殺簡仙源北著
書劬龍猛護法掌司直正宗序昭穆原教辯離即

謂儒
釋二

教雖殊皆相

資而化物也

筆峰迴齒率詞海彌漚沔紛葩若輝散宏

麗尚典實匠媧補穹旻効禹導溝洫動成幾百卷經世

爲模則斯文千古雄斯義萬夫特據理從所征處戰無

弗克吾皇遇唐虞吾相遭禹稷抱書乃西獻乘時闢文

塞喜覽明光殿撫念加歎息賞其繫表才鬱爲天下式

謂嘗獵英雋忽此遺弩弋小避三公位高憑四依軾慧

日昏復明禪經亂還絨智林久宜茂福田廣須植大信

過豚魚至仁周動植良可班諸藏尋即遵所敕

略去
五韻飛

章類席卷橫議同鏡拭春喉那補爨樹口拊拱默始知

猛陵翁

即師里名彼多稱猛陵男子故

原筮無遺愜金湯義存存涇渭

情湜湜

略去二韻

既而謂東歸湖山夢還憶列戶翠可染當

窓秀堪織風尚清散為僧年白駒逼孰貴秉燭遊鼓缶

歌日昃林遠爭追隨宗雷苦淒惻禪誦心稍隙騷雅興

仍亟道行愈峻卓德聲轉輝赫

略去七韻

宴坐居無塵遺偈

見敦飭大梅鼯鼠聲匪我相囚福

師臨終偈云不似大梅老貧隨鼯鼠聲云

奄然遂長往休徵難具仿明發鷲峰下闍維火初熄五

相堅不化鮮柔光耀翌精如金出冶瑩如玉分切式旌

無妄犯奉法剛而寒靈山衆咸觀望塵加渴臆尅奇冠

前修景仰動殊域王公發嘆嗟士庶增悃悞

略去韻

共收

鶴林骨合葬鷺山側

略去韻

澗猿徒自號書魚蠹誰蝕僧

史半十科工歌全九罌

略去韻

憶我來吳楚募師自岐嶷

獲記楞伽遊誦味喻鱸臍

師有遊吾湟川燕嘉亭及楞伽山寺記也

招人既

云殂至道亦將踣已乎三十年臨弔徒深尅妙峰高為

塔梵天廣成國

國或作廣

萬物備蒸嘗五雲爭輔翊乾坤或

幾息海山有時泐師其道與名勃然長鬚鬚

南海楞伽山 守端拜題

余研味其詩雖風調氣韻高爽酋勁而中間凡用
事綴韻過於迂僻今略取其辭意簡雅超邁之句
次成七十三韻亦可見其才志向慕之誠至焉

贊明教大師 并叙

始余讀嵩禪師輔教編愛其文落落有奇偉氣而
能發揮釋氏之道以諭夫當世名儒釋子之不知

教本者俾之達性命之奧見聖賢所以施教敷化之心而不淪於是非相戰之地

中間叙繁
處皆略之

若夫統

之有宗而窮深及微則尚恐二家之學者或未易曉其邊徼况能究其道而見其全乎及其示寂後闔維而五物不灰然此雖師之糠粃而以歿故已方見信於其徒則其所蘊精粹要妙而不獲見知於人者多矣嗚呼道之難傳也若是乎予甚悲之其道雖能化當世名儒而不能盡化其徒故師歿

後其真風勝軌不甚章章絢爛於世茲或希世之才黃鍾之音不投於里耳小器哉予晚路末學不遑洒掃于庭宇而覘望餘光徒臨風揮涕有胡不萬年之歎也今採其遺芳稽首長想系之以贊云
藤山之東紫雲浮空爰有僧龍名配維嵩自脫襁褓居仁由孝冰雪其躬律儀是做遠覽高翔遊吳暨梁道繼佛祖欲隱彌彰適丁祗園謗談四起縱筆成書蓋不得已既而撲滅曇花重榮嘉祐之間獨飛英聲帝澤屢霑

公卿折節吐嗟吾徒反肆馱舌遂賦歸歟安於覆盂少
林食毒異軌同途小智自賢所在成市頑然誰儔理固
宜爾太阿出匣斬蛟戮螭用之補履曾不如錐嗒焉云
逝遺迹莫繼凜乎真風永蠲氛翳嗟乎鯁生不克祇承
每一念至氣填于膺竟何能為只益慚忤聊筆清芬式
告來學

龍舒天柱山比丘修靜拜贊

題明教禪師手帖後

二首

吾佛大法蓋世出世間千聖萬靈道德性命之本源源

深本妙非思議可及其應緣揚化也當必資開士因王
臣之力啓物信而潔外魔開士出蓋視法運之通塞決
與世致益不苟然也藤州明教大師嵩和尚其人歟妙
達玄宗博極世解出皇祐至和間見外黨有致吾法之
瘡疣者則曰予竊菩薩權為如來使辨而明之以度彼
惑俾歸正趣實所任職矣於是著為書奏聞於天子蒙
仁宗皇帝嘉賞勅入經藏班行天下於是魔雲廓而佛
日輝也和尚既建功德於教門其英聲茂實壯飾其曹

稍蘊知識舉知欽慕而比年法俯下衰人根鄙劣喜剝
染之便爭變形服竊入吾家紛情世塵濫廁僧倫者皆
是見聞思慮不脫里俗何高德勝義之能講慕哉竇因
擇言上人當此時能竦所聞而矜所慕其賢於濫廁之
流者故可稱也雖久游禪林服業祖道而於弘教大士
知開導耳目起希冀之志也故在京師聞律僧有上世
與明教相厚善者乃訪問之彼為道前事且出此帖示
之擇言苦求得之珍收南來以示余若有異獲因語之

曰汝企其人而重其遺跡以彼名耶實耶以名則於彼外矣徒可資於談柄無益乎已以實則明教之至論可考以發覆致遠者甚多汝宜尋而究之且想彼標致以自勉激則終有益也矣年月日

又帖

明教大師嵩和尚自稱藤州東山沙門乘風悲誓出于皇朝始以天下搢紳先生或未究我法大道之源而域守所習跡佛教為夷狄之法而蔑視之至加毀滅謂無

使混害中國周孔之道和尚惜彼循枝而遺根背源而
向派非徒謂暗乎此其學周孔之道也可得謂能自其
明而極其誠由其誠而盡其道以成天下大公公包
博無外純全之妙神者耶由乎不自知所以不知人矣
和尚博極古今儒釋教道之本會通聖賢理事論議之
跡若振綱張網舉領提毬目分毛歟見者皆明義貫理
融感會神府乃知凡聖人所出之方所示之言持其教
之跡矣使知識之明者由此自返所以跡所以言者以

內照之則靈宇廓然無內外無彼此豈華夷儒釋之可
辨耶乃著之書號輔教編以開諭措紳先生之徒奏之
於天子上嘉歎之勅與班行而名卿鉅儒至如歐陽文
忠公諸豪覽其書莫不歎服敬而禮之復緣淺識講解
輩毀其宗門故撰正宗記定祖圖以辯其說亦奏上行
之既而還東吳示滅靈迹甚異具如傳記其墻岸法門
啓迪信路雖古高僧之雄者不過爾耳禪人寶智得其
遺帖求跋故援毫信手愧不能述其萬一也靈源叟書

至聖至言回偏樹正皇天覺決淺蹟深
大哉善哉福霑諸後重刊所疏續繼斯云

拾遺

宋明教大師鐔津集重刊疏

夫明教大師乃是大乘菩薩知佛法有難於是乘
大願輪復生世間著書輔教者也昔宋之鉅儒搢
紳先生嘗評其文曰不惟空宗通亦乃文格高斯
言是矣歐陽子云不意僧中有此郎耶當時排佛

之心已廓然熄滅而無餘矣古今僧中之為丈者
多而未嘗有出其右者所謂北斗以南一人而已
自昔兵變已來書板磨滅後之學者無所見聞為
可憂也茲欲重刻吳中所費繁夥於是綴䟽仰謁
羣賢同道學者覩茲勝事得無慨然贊助者乎

為因緣而出現世間咸宗驚嶺發文章而黼黻聖諦惟
尚鐔津深窮萬法之原同入三乘之藏讀之可以開人
天之眼目統之可以掃儒釋之藩籬好書而不好此書

孰謂好學明道而不明斯道豈曰明心欲重刻雲間益
廣傳于天下致永叔黎明之見名重一時遭仁宗天縱
之資功垂萬古羣賢既遇勝事當成洪武甲子春天台
松雨齋沙門 原旭 撰

右松雨老和尚為琦首座製䟽重刊宗明教大師文集
於雲間既已化行開至二十餘版矣適琦公疾作不克
成其事茲以天全叡首座愍邪法增盛發堅固志繼其
芳猷一日持此卷過余堅密精舍命題于後余雖不敏

觀此勝因不覺踴躍而喜此集湮沒久矣若使竭力成就大行于世正所謂揭慧日於中天耀昏衢於叔世者也天全其勉之

永樂三年冬嘉興府僧綱司都綱天寧弘宗書

重刊鐔津文集後序

學有及物之功文為載道之器學而不能利乎物徒學也文而不能衍乎道空文也若夫推其道發於文章肆其學以援斯人宋明教高禪師其人歟嗟夫吾佛之教

法心法也生靈同而有焉但為虛妄所蔽不能顯現汨
四生淪六趣何由得已哉而吾佛愍之以此心法隨器
而諭俾各得乎本有或者不仰恩懷德反生譏毀是則
自毀其心非毀其教法也教中所謂世智辨聰八難之
一且不信而毀又非虛妄所蔽若虛妄所蔽或能了妄
即真不信而毀則自昧其心自昧其心猶種之敗芽之
焦不復有發生之日矣得不尤可愍哉而明教性稟生
知能體佛意學則必欲援世非徒學也文則必在明道

非空文也況是時天下學士宗韓氏以拒我故勸書原
教諸文不得不作焉學者總稱號鐔津文集斯文行世
真救世明道之要術也可一日而無哉舊版湮没人皆
痛惜嘉禾天寧首座天全叡公乃東海慧眼弘辯禪師
之弟子施衣資重梓流行其亦明教之心也歟板既成
請叙其後蒙晚生讀其文集有不得執筆從游之歎今
獲廁名于後不亦大幸乎不亦大幸乎

永樂八年歲在庚寅夏四月初吉

浙江杭州府徑山禪寺住持沙門文琇

鐔津集卷二十二

鐔津集後叙

文道之所寓也離乎道而不合公論謂之文可乎宋明
教大師究最上乘佩傳法印為法亡軀不顧人或詆之
擠之未嘗色喪氣沮真可為一代師表也以文章自任
著書輔教僅數十萬言總曰鐔津集其議論抑揚也神
變雄偉如怒猊抉石金翅擘海非韓盧斤鷄可形象乎
哉其融會貫通也浩博汪洋如江海如溟渤非澗沚溝
渠可涯涘乎哉時大臣既敬服而讚誦之天子又褒寵

而旌號之文不合公論能致此乎嘉禾縈庵登禪師瑩
然璫講師愍其板失募同志緣兼傾已橐重梓流行俾
大師弘道之心千古不死也二師之勤可嘉可尚功既
命源識歲月于左嗚呼道固寓於文因其文而於心傳
之絕者續道之晦者明其誰乎興言至此自益顏汗弘
治十二年歲次己未陽月初吉雲山廣源識